

欽定大清會典事例

欽定大清會典事例卷九百十七

工部

河工考成保固

考成保固。○順治初年定。黃運兩河隄岸修築不堅。一年內衝決者。管河同知通判州縣等官降三級調用。分司道員降一級調用。總河降一級留任。如異常水災衝決者。專修督修官皆住俸。修築完日開復。本汛隄岸衝決隱匿不報。別指他處申報者。加倍議處。如一年外衝決者。管河等官革職。戴罪修築。分司道員住俸。督修完

日開復本汛隄岸衝決隱匿不報。別指他處申報者。管河等官降二級調用。分司道員降一級調用。總河不詳查具題。罰俸一年。如地方衝決少而申報多者。降三級調用。轉詳官降二級調用。總河不查實具題。降一級留任。無論一年二年。遇有衝決地方。限十日申報。逾限者降二級調用。其沿河隄岸不能先期修築。以致漕船阻滯者。經管官降一級調用。該管官罰俸一年。總河罰俸六月。○十六年議准。河工各官。遇有升遷降調事故。將任內修防事宜造冊交代。離任

後有隄岸衝決者。該管官叅處。○十七年題准。修築隄岸工完。令承修官出具伏秋無虞印結。同冊奏銷。如本年衝決者。即指名題叅。○康熙元年題准。黃河隄岸衝決。在一年內者。叅處修築之官。在一年外者。叅處防守之官。運河隄岸衝決。在三年內者。叅處修築之官。在三年外者。叅處防守之官。如黃河工未至一年。運河工未至三年。修築官於保固限內去任。防守官不為料理。致被衝決者。將防守官一併叅處。○九年題准。河工衝決地方。承辦椿柳等物遲緩。或稱

非係本汛推諉誤工者。皆降一級調用。不行轉  
催之上司罰俸一年。○十五年議准。河道關繫  
甚大。隄岸衝決。皆由修築不堅。防守怠玩所致。  
宜釐定處分。之例。嗣後不得諉之水災。具題黃  
河隄岸。仍定限一年。運河隄岸。仍定限三年。黃  
河隄岸。半年內。運河隄岸。一年內。衝決者。經修  
防守等官。皆革職。分司道員降四級調用。總河  
降三級留任。黃河隄岸。過半年。運河隄岸。過一  
年。衝決者。經修防守等官。降三級調用。分司道  
員降二級調用。總河降一級留任。如已過年限。

衝決者。管河各官皆革職戴罪修築。分司道員住俸督修工完開復。總河罰俸一年。若年限內衝決。經修之官已去。仍將經修官與防守官一同處分。其年限內本汛隄岸衝決。別指他處申報者。經修防守等官皆革職。分司道員降五級調用。總河不查實具題。降三級調用。其餘仍照舊例。○十七年議准。知府有地方之責。嗣後如遇衝決等事。照道員處分。承修兩河隄岸一應工程。均限半年完工。半年不完。承修官罰俸一年。督修道府罰俸半年。再展限三月完工。如仍

不完。承修官降一級調用。督修道府罰俸一年。  
如承修官原係革職戴罪之人。半年限內不完。  
降一級調用。不准展限。工程別委他官。仍限三  
月完工。不完。罰俸一年。督修道府所屬官員工  
程。一年內不完。降一級調用。限內不完。總河不  
題。叅罰俸三月。若實係大工。不能依限完竣。令  
總河豫為題明。其監理廳印。分管佐雜等官。所  
築隄工。合式堅固。該管廳印。河官出具甘結。道  
府驗實。加結申送。總河勘實具題。准照應升之  
官。加二級即升。原非正途者。均作正途一例升。

遷至分管官所築隄工有一處不堅固。或一二丈不豐滿合式者。降一級調用。兩處不堅固。或三四丈不豐滿合式者。降二級調用。三處不堅固。並五丈以上不豐滿合式者。革職。監理官所轄分管官有一人議處者。監理官罰俸一年。二人議處者。降一級調用。三人議處者。降二級調用。四人以上議處者。革職。由監理官揭叅者。免坐。如議處議敘相同者。准與抵算。若興舉大工。附近地方官不協同設法募夫。不將急需柳草等項速買解運。致誤河工者。題叅。將州縣官降。



三級調用。道府降一級調用。凡舉劾大計。將河工一併考成。河道果無衝決。或旋決旋修。不致殃民損課者。方准薦舉。○又議准各省河工隄岸有無衝決。該督撫於年終造冊報部。○三十年

諭嗣後隄岸衝決。僅河水漫決。河流不移者。應否免其革職。止令賠修。著確議定例具奏。欽此。遵

旨議定。嗣後隄岸衝決。河流遷徙者。照定例處分。若隄岸漫決。河流不移者。免其革職。責令賠修。年限內漫決者。經修官賠修。年限外漫決者。防守官

賠修。○又覆准。嗣後一應工完。年終報部之日。將各部院堂官及科道官職名。開列具題。

簡命察勘。俟驗明所修丈尺。用過埽料等物。與原估題疏相符。准其開銷。如有不符。並巧飾誑報等情。交部嚴加議處。○三十四年奉

旨。察勘無益。嗣後差遣察勘。永行停止。○三十九年

諭。河工積弊。汎官利於隄岸有事。修建大工。得以侵冒河帑。又希圖修橋建牖。興無益工程。於中取利。著嚴飭各官。痛改前非。加謹修防。儻有故違。定行正法。以示懲戒。其地方有司官。膜視河工。致有遺誤者。題叅

到日。將地方官亦行正法。河官平時須豫備物料。以  
為不時修防之需。○又議准。嗣後侵帑誤工。如分管  
微員照例懲處。其現任河官及在工效力旗員。  
即行題參革職。○又議准。嗣後呈報險工。該道  
親行察勘確實。即令動帑搶修。一面估計申報。  
總河察覈。如係假捏。即以誑報題參。該道徇隱。  
一併叅處。○又覆准。嗣後隄岸衝決。河流不移  
者。管河各官皆革職。戴罪勒限半年賠修。分司  
道員各降四級督賠。工完開復。如限內不完。承  
修官革職。分司道員降四級調用。總河降一級。

留任。未完工程。仍令賠修。其應賠工程。已經奏明動帑者。仍將應賠銀。亦照賠修例。勒限處分。如限內不完。分司道員不揭報。總河不題叅者。皆照徇庇例議處。又議准。凡黃河曲處。窪濬引河。果屬深闊。偶至淤墊者。該督親勘保題。免其賠修。○四十二年

諭。河工官員。領正項錢糧修築隄岸。被水衝決。應賠還者。照例追賠。其自捐銀修隄。完工之後。被水衝決。或因地勢難築。竣工無期。若仍責令賠修。甚屬可憫。著總河查明具題。免其賠補。○四十六年。覆准。河南省

隄工由巡撫就近料理如遇水長即嚴飭管河等官率領堡夫搶護如怠玩貽誤將該地方官照黃河定例議處仍查明年限著落賠修。四十九年議准嗣後修防工程河道按工發帑廳官領銀承辦其微末官弁及效力人員止令防守催趨押運物料不得輕給帑金如果才優家裕該廳申詳該道轉報該督方准給發如濫委匪人致虧帑誤工者本人革去職銜限一年追完復職逾限不完出結廳官革職戴罪勒限一年賠完完日開復該道降四級亦勒限追賠完

日開復限內不完。即依所降之級調用。該督降一級。與該道一同分賠。完日開復。不完每案罰俸一年。仍著督道廳分賠還項。○五十二年覆准。嗣後修築工程。該廳呈報到日。該督與道員即親勘工程。驗明物料。具題修築。工完查勘報銷。如修築不堅。短少物料。將承修之官題參。從重治罪。如該道不揭該督不題參者。皆照徇庇例議處。○雍正二年議准。一應工程。嚴飭承修官據實估報。如估報時仍留數減餘地者。該督撫題參。嚴加議處。○又議准。嗣後給發錢糧。交

與諸練河務之人修築如修築不堅致有衝決者。委官督令賠修。不能賠修者。題叅革職。別委賢員。給發錢糧修築。將所用錢糧勒限一年賠完。准其開復。逾限不完。交刑部治罪。仍著落家屬賠完。如力不能完。著落發錢糧之上司賠補全完。○四年

論賠修之例。甚屬無益。從來河官額帑修工。必豫留賠修地步。以致錢糧不歸實用。工程斷難堅固。即幸而得保無虞。而錢糧終歸入己。似此情弊。相習成風。必照侵欺錢糧例嚴加治罪。方足示懲。著九卿詳議具

奏欽此遵

旨議定。嗣後承修之官估計工程。總河與該督撫分司勘明工段丈尺。椿埽料物。如果與所估數目相符。覈實具題。發帑興修。如估計過多。有心浮冒。察出。即照溺職例革職。察勘之官不實心詳覈。扶同徇隱。即照徇庇例議處。至工完之日。該總河督撫分司再逐一察勘。修過工程。果否如式堅固。與原估丈尺錢糧數目相符。如工程單薄。物料剋減。錢糧不歸實用。以致修築不堅。不能保固。將承修官指名題參。照侵欺錢糧例分別



治罪。其侵欺銀著落該員家產勒限追賠。所修工程令總河督撫等別委賢員。動帑修築堅固。工完題銷。又議准直隸省子牙河南運河新修工程均照運河創保固三年。北運河工程較永定河稍平易。較南運河則為險要。立限保固二年。限內衝決。照例賠修。○五年

諭。向聞河工不肖之員。有將完固隄工。故行毀壞。希圖興修藉端侵蝕錢糧者。著該督時加察訪。再有此等不法之員。著即奏聞。於工程處正法示衆。○又

諭。直隸河工衝決之處。著落河官與地方官賠修。再敢

情玩一併革職。枷示工所。○又

諭。河工追賠之項。其中情由不一。有該員侵蝕入己者。有修築草率。本不堅固。易致衝決。應當賠修者。有當潰決之時。該員豫知例當賠修。而以少報多。先留地步者。甚至有故意毀壞工程。以便興修開銷者。種種弊端。不可枚舉。皆法所難寬。但亦有經手之人。本無情弊。而照例則應分賠者。在該員情稍可原。而承追之時。無力全完。亦於國帑無益。其如何酌量分別定例。方為妥協。著九卿詳議具奏。欽此。遵

旨議定。嗣後黃河一年之內。運河三年之內。限工陡遇

衝決所修工程原係堅固。於工完之日。已經總河督撫保題者。承修官止賠修四分。其餘六分。准其開銷。如該員修築錢糧均歸實用。工程已完。未及題報。而陡遇衝決者。該總河督撫據實保題。亦令賠修四分。其餘均准開銷。如黃河一年之外。運河三年之外。隄工陡遇衝決。該管各官實係防守謹慎者。該總河督撫察實具題。止令防守該管各官共賠四分。內河道知府共賠二分。同知通判州縣守備共賠分半。縣丞主簿千總把總共賠半分。其餘六分。准其開銷。其承

修防守各官皆革職留任。戴罪效力。工完之日。准其開復。儻總河督撫保題不實。照徇庇例議處。仍照定例勒限分賠還項。○又議准永定河新修工程。照黃河例保固一年。○又議准嗣後沿河州縣遇有被淹之處。令地方官會同河官親勘被淹情由。據實通報。如有隱匿民災者。照報災怠玩例議處。查報不實者。照溺職例議處。○八年議准嗣後不請開放之牘。審度形勢果係不應開放。雖限內未開。亦應准其保固年限。以免承修官守候之苦。如本應開放之牘。承修

官因修築不堅故意不請開放希圖掩飾雖已過三年仍應以開放之日起限保固並將故意遲延之承修官及不行查報之該管官一併叅處○十年

諭河中石塊木椿抵觸糧艘著河臣嚴飭河道等官於水落時沿途察看悉行起除以清河路僅辦理疏忽仍有起除不淨等弊著巡漕御史叅奏將該管河道等官從重議處○十一年覆准永定河貼砌片石等工仍保固一年別項加修新工保固三年漳河潯淀河並太行隄工照黃河例保固一年其餘

平易工程。照運河例。保固三年。○十二年議准。黃河堡夫挑積土方不及數者。專汛文官罰俸一年。該管廳官罰俸六月。挑積不及半者。專汛文官降職一級。留任。趙挑該管廳官罰俸一年。兵丁挑積土方不及數。並不及半者。專管汛弁及該管將備議處亦如之。○乾隆十年

諭。從前石林口衝決。用過修築工料銀二十三萬九千一百餘兩。部議著落河官賠補。原以該處舊有土壩。致被衝決。應照疏防之例賠修。第聞石林土壩。乃河臣率民修築之工。並未動用錢糧。與永定河官隄疏

防衝決者有聞。且七年黃水異漲。亦非尋常可比。動  
項既多。該管各官勢必艱於賠償。著加恩免其追賠。  
嗣後凡有隄防之處。務須先事綢繆。毋得再蹈前轍。  
若稍有疏虞。法不寬貸。○十五年議准。嗣後開濬河  
道。以領帑日為始。限十日興工。須俟水築隄者。  
准於限外的展半月。計土千方。限半月竣工。數  
多者准此加展。修建橋樑隄壩等工。均限兩月  
興工。工料數百兩及千兩者。以興工日為始。限  
三月。三、四、千兩者。限四月。各竣工。其工料自五  
千兩至萬兩以上者。如平易工程。亦限四月竣工。

工果工程險要不能依限告竣者准於估報冊  
內豫行聲明酌展限期違者皆交部嚴處○二  
十一年

諭黃河兩岸當夏秋水勢盛漲之時往往刷成支河若不於水落時即行堵築一遇水發則就下之勢必衝突奪溜於河防農田均有關係向時之陽武近日之孫家集皆其明鑒也嗣後該總河等應督率廳汛逐一查勘實力堵築於次年桃汛前完竣其有承辦不力者將該管員弁查叅交部議處其作何分別勸懲著河道總督會同督撫詳議具奏欽此遵



旨議定。嗣後江南山東河南等省。黃河兩岸灘地衝刷。支河每年於霜降水落之後。廳營各員。即將各汛內灘地衝刷支河幾道。長寬深淺丈尺若干。應築土壩幾道。高矮長寬丈尺若干。逐一親加確勘。移會地方州縣印官覆勘。覈計土方數目。先儘兵夫力作。如兵夫額數不敷。地方官即撥民夫堵築。統限霜降後一月內會造清冊。詳道覈轉。定限於次年春融興工。務於桃汛前如式完竣。結報該管河道親驗轉詳。永為定例。經過伏秋汛後。如廳印各官所築土隄堅實。並無坍塌。

塌者。照修築隄岸已有成效。例准加一級。二年無誤。加銜一等。三年內始終無懈。以應升之缺。即用。其營汛各官。所築土隄堅實。並無坍塌。亦照文職例。准其加一級。二年無誤。隨帶加一級。三年內始終無懈。以應升之缺。即行題補。如廳營各官。於水落後。不即親勘估計。移會印官覆勘。或印官推諉。不即查勘堵築。及桃汛前不能完竣者。照隄岸豫先不行修築例。經管官降一級調用。該管官罰俸一年。總河罰俸六月。至堵築不堅。致有坍塌及衝突奪溜情事。亦即查明。

承築各員揭叅照管築隄工例。有一處不堅。並一二丈不豐滿合式者。降一級調用。二處不堅。並三四丈不豐滿合式者。降二級調用。三處不堅。並五丈以上不豐滿合式者。革職。監理並兼管營汛各官。所轄分管官有一員議處者。罰俸一年。二員議處者。降一級調用。三員議處者。降二級調用。四員以上議處者。將監理並兼管營汛各官革職。如議敘議處相同。准予抵算。如係監理並兼管營汛各官揭叅。准免連坐。該管河道。每年九月後。親驗轉詳。河臣覈明具題。遲延。

者議處。又黃河兩岸有隄係豫省廳營管轄。而  
內外民田隸東省者。亦有隄係東省廳營經管。  
而內外民田屬豫省者。該地民人。往往呼應不  
靈。地方官與廳員亦因隔屬。遂多膜視。嗣後隄  
工內外居民。無論本省各省。如有需用修防之  
處。知照地方官一體調撥。俾河防農田。兩有裨  
益。○二十三年議准。現任江南河工文武員弁。  
凡有應追覈減分賠等項銀兩。除承追官催追  
不力。仍照向例按限查叅議處外。其欠帑人員。  
無論文職武職銀數在三百兩以上者。勒限一

年全完。三百兩以下者。勒限六箇月全完。應支廉俸人員。於應得廉俸內扣抵。儻扣不足數。或係不支廉俸之員。勒令自行完繳。逾限不完。現任人員停其升調。效力人員停其補授。再限一年及六箇月完繳。俟完繳後升調補授。再逾限不完。現任人員暫行解任。效力人員暫革職銜。仍留工比追。再限一年及六箇月完繳。開復。如仍無完繳。題叅監追治罪。查封財產變抵承追不力之員。初叅復叅。照承追雜項錢糧例議處。○又議准江南省各員未完繳減分賠等項銀

兩。照東河例歸於地方官查追。分別扣限題參。  
○二十四年議准江南省河工修做工程務須  
恪遵定例。飭令各該廳員領帑承辦。不得派委  
微末員弁。致虧帑項。如工程緊急辦員不敷。必  
須添派佐雜等官。趙辦者。亦必慎選實係才具  
可用家道殷實之員。定以限制。不得過五百兩  
之外。取具該管廳官保結。詳道。儻有虧帑誤工。  
將出結之廳員嚴加議處。飭令分賠。該督等一  
併交部議處。分賠還項。○二十八年議准江南  
省河工分賠銀兩成例。酌改五股分賠。內道員

分賠一股。知府參遊共賠二股。廳營州縣共賠股半。文武汛員共賠半股。○二十九年覆准直隸省通惠河一切工程照運河之例保固三年。○三十九年

諭。漫工所用錢糧河工成例係准銷六分。應賠四分。此等應賠之項。在道府等廉俸較厚完繳尚易為力。至文員廳佐以下及武職各員均屬俸薄力微。若賠數過多完繳未免拮据。著按例查明妥辦。該部即遵諭行。欽此遵

旨議定。嗣後遇有隄岸保固限外陡被衝決查明該管

各員實係防守謹慎。並無疏虞懈弛者。將用過錢糧。除照例准銷十分之六外。其餘應賠四分銀兩。按其責任重輕酌定。應賠多寡。總分作十成計算。河臣總理河務一切董率機宜。是其專責。應著賠二成。督撫兼管河防。責成綦重。應著賠一成。河道係專司河務大員。修防乃其職守。應著賠二成。廳員駐紮河干。工程錢糧皆所經手。應著賠一成。知府州縣均係地方正印官員。例有協守之責。應分賠二成。參遊專司估計。督率防護。守備協辦工程。應分賠一成半。文武汛



員駐工防守。責亦難辭。應分賠半成。如無兼管督撫及額設參遊等官省分。即將應賠銀兩。在總河以下文武各官名下。按照應賠成數。分別攤賠。○四十九年奏准山東省運河各工用項既已充裕。自應加展保固。三年者加為六年。五年者加為十年。限內遇有殘缺坍塌。俱責令承辦之員自行修補。不准再行開銷歲修錢糧。其有事故實在無力者。即著原派之總催各員及總河等各名下分賠代修。○五十四年

諭黃河南北兩岸築隄捍禦。原以防河水盛漲時泛溢。

為患。專藉大隄為之保障。以河流正身而論。則濱河兩岸灘地。在大隄以內者。當謂之隄內。在大隄以外者。當謂之隄外。此一定不易之理也。乃向來河臣等所奏。以附近河身兩岸灘地。指為隄外。而大隄外之民田廬舍。轉稱為隄內。殊為倒置。必係河臣等意圖影射。以隄內之民田廬舍為隄外。遇黃水衝缺口岸。即可指稱在隄外漫溢。以為掩蓋蒙混之地。不可不即行更正。以杜隱飾弊端。嗣後總以黃河正身為主。附近兩岸灘地。在大隄之內者。謂之隄內。在大隄以外者。謂之隄外。毋得再有牽混。以致陳奏失實。藉滋

影射也。○五十九年

諭江省修築土壩。原為保護隄根。但逐漸接長。有礙河流。今此等接築土壩。皆由工員等意圖侵冒。以修築壩工為名。稟報開銷。可資需潤。係向來河員通弊。該河督不加詳察。遂致添築壩堰。無所底止。殊非慎重河防通盤籌畫之道。著交部議處。○嘉慶五年

諭黃河漫溢自古為然。我朝

列祖

列宗飭令河臣開挖引渠。加築隄堰。工程不知凡幾。所費金錢。不啻億萬萬計。原所以保衛民生。偶遇潰溢。

不獨居民漂溺堪虞。即有遷徙高阜者。其室家田畝  
皆已淹浸。仍不免流離失所。是以國家不惜多費帑  
金鳩工集料。該河工大小文武官員。分防經理。無非  
為小民籌及萬全。期於安堵。總司河務者。如果平日  
加意隄防。河流自然順軌。即或偶有漫溢之事。能趕  
緊堵築。俾帑項不致多糜。工程克臻穩固。實所深願。  
即或費用較多。但能為小民保護無虞。帑金原所不  
靳。若河員等平日捏報險工。於辦理要工時。又復偷  
工減料。任意冒銷。以致屢築屢墊。伊等侵冒錢糧。貽  
害百姓。即為國法所不貸。天理所不容。嗣後河工文

武大小官員。當滌慮洗心。各矢天良。認真辦理。為民捍患。不但身受國恩。子嗣亦必蒙福。儻仍前玩工。侵帑殃及黎民。本身即倖逃法網。其孽報必在子孫。民命至重。不可不倍加敬懍。○七年奏准。直隸河南山

東江南等省。河工堵築事竣。例應分賠銀兩。數在三百兩以下者。定限半年。三百兩以上者。定限一年。數在千兩至五千兩者。定限四年。五千兩以上者。定限五年。勒令完交。若數至萬兩以上者。以十分計算。於五年限滿日。完至七分者。其餘准照未完銀數。按例起限完交。如限滿不

完。及萬兩以上限內完不及七分者。即由該承  
追衙門查叅現任人員。停其升調。效力人員。停  
其補授。勒限完納。其應升調及補授各河員。並  
曾任河工地方。別經升調人員。吏兵二部於題  
請到日。移咨工部。查明有無逾限未完欠項。叢  
覆辦理。如有逾限不完之項。該督撫率行題請  
升補者。將督撫一併查叅。如係升調候補及丁  
憂告病人員。通查原籍任所。實無家產隱寄者。  
准其於補官日完交。如係革職及已故人員。由  
該旗籍查明該員子孫。並無服官。實係家產盡

絕別無隱寄者。該旗籍及任所官。出具印甘各結咨部。年終彙題豁免。不得率議分攤。致滋擾累。其或委辦工段。草率偷減。或購辦物料。有侵蝕虧短損失。燒毀等項情節。專摺請

旨勒限追交外。該上司亦有僉委不慎之咎。如本人無力完繳。即著落該上司名下攤賠。如攤賠之項。上司別經事故。查無家產者。即著照例豁免。不得輾轉分攤。致違定例。違者照例議處。○二十年

諭。徒陽運河煞壩挑河各工。上年甫經興辦。何至遽形

淺阻其辦理草率實難辭咎著照該督等所議將上年承挑各員罰賠六成該管知府罰賠三成督辦道員罰賠一成均令即日完繳歸款著嚴飭承挑督辦各員遵照定限趕辦。二十一年

諭東省承追曹汎漫工案內未完分賠銀十三萬九百五十兩零例限已逾著勒限嚴追即照該撫所請未完銀一萬兩以上者予限三年二萬兩以上者予限三年半五萬兩者予限五年務令依限全數完繳如屆期不完履行叅辦。○道光元年覆准江南省桃北中河二廳嘉慶十八年堵築丁家莊並遙隄緯



隄缺口工程各按廳境該管汛地實用銀數分別攤賠○二年

諭嗣後運河民埝除修民埝仍循其舊外其借帑修築官為經理各工即照官隄之例三年內陡遇衝決原報工程堅固者著承辦官賠修四分餘准攤徵還款如原修本未堅固以致被水衝決即將承修官革職責令全行賠修工竣奏明辦理其調任及有事故各員亦著照數追賠○五年

諭此次高堰山盱兩廳石工長至一萬一千餘丈用銀至九十餘萬兩之多非尋常工程可比若僅照例保

固將來工員得以置身事外。糜帑滋多。著於例限三年外。再加保固一年。如限內稍有掣塌。即令原辦官賠修。示懲將來承辦坦坡各員。亦著照此辦理。○十六年議准。山東省運河各廳共設牕五十座。每拆修定例保固三年。嗣後估修牕座。於保固例限之外。再加保固三年。○十九年議准。河工賠項如

特旨嚴追銀兩。未完銀數十兩以下起。至十萬兩以上止。限期自勒限一年起。至十五年止。處分自罰俸二年起。至革職止。河工覈減銀兩。未完銀

數在三百兩以下者統限一年零六箇月。三百兩以上者統限二年。俱分三限。處分自停升。停補起。至革職監追止。河工溢領銀兩。未完銀數。在三百兩以下者統限半年。三百兩以上者統限一年。俱分三限。處分自停升。停補起。至革職監追止。督撫總河尋常分賠等數銀兩。未完銀數。自一千兩以下起。至十萬兩以上止。限期自勒限一年起。至十五年止。處分自罰俸九箇月起。至降二級調用止。河工屬員尋常分賠銀兩。未完銀數。自一千兩以下起。至十萬兩以上止。

限期自勒限一年起至十五年止處分自罰俸  
九箇月起至降四級調用止○咸豐七年奏准  
衝決隄工如係上年原塌處所除隄工照例賠  
修四成外其餘挑壩引河等工統令賠修四成  
○光緒八年議准直隸省高坦邨漫溢稱係子  
牙河西岸新修隄工衝缺自不得指為不在官  
辦之內行令該督將此次漫決工程用款照例  
責成前案承修各員認成賠修不得復籌經費

○十年

諭山東黃流剽悍為害閭閻節經籌撥鉅款諭令該

撫修築長隄。茲據稱全工告成。統計南北兩岸隄長一千餘里。此項工程。朝廷不惜重帑。責令督屬興修。即著該撫親往履勘。詳細驗收。如果保固限內。稍有疏失。貽害民生。定惟該撫是問。○十一年覆准。河工實缺候補人員。有無分賠銀兩。行令東河漕運直隸山東各督撫轉飭所屬。於每年年終。造具總冊報部查考。嗣後遇有補缺試署。既咨報吏部。即將該員有無河工分賠完欠銀兩。隨咨本部。以備查覈。○又議准。河工分賠逾限未完銀兩。奏明催追之日。按照例限減半。立

限追繳三百兩以下勒限三箇月。三百兩以上勒限半年。一千兩至五千兩勒限二年。五千兩以上勒限二年半。一萬兩以上勒限三年。二萬兩以上勒限三年半。三萬兩以上勒限四年。以次遞加。有銀數在十餘萬兩外。仍照每萬兩加限半年完繳。均由該管上司承追。再有遲逾本員叅處。承追官照不力例開叅。

欽定大清會典事例卷九百十八

工部

河工

種植葦柳

禁令一

種植葦柳。○順治十三年定。濱河州縣新舊隄岸。皆種榆柳。嚴禁放牧。各官栽柳。自萬株至三萬株以上者。分別敘錄。不及三千株並不栽種者。分別叅處。○康熙九年奏准。於沿河州縣擇閒散人。授以委官名色。專管栽柳。三年分別勸懲。○十五年議准。河官種柳不及數者。免其處分。成活萬株以上者。紀錄一次。二萬株以上者。

紀錄二次。三萬株以上者。紀錄三次。四萬株以上者。加一級。多者照數議敘。分司道員各計所屬官員內有一半議敘者。紀錄一次。全議敘者。加一級。均令今年終題報。二十年定。武職栽柳。照文官例議敘。二十二年定。河官栽柳成活二萬株以上者。紀錄一次。四萬株以上者。紀錄二次。六萬株以上者。紀錄三次。八萬株以上者。加一級。多者照數議敘。其分司道員因屬員栽柳議敘之例停止。三十一年議准。河道隄面闊二丈者。留八尺為行路。其一丈二尺密栽細



草遇有坦坡均栽臥柳。○四十四年

諭高家堰石工完者准先予銷算隄根之下廢地可諭  
河員試令種稻其餘除留取土搶修之地外令捐栽  
蘆荻以資工料照例議敘。○四十九年覆准令河南  
各州縣於官地內責令堡夫廣栽柳樹。○六十  
年覆准河隄種植柳樹僅有將柳園地畝墾熟  
耕種私收籽粒以致草漸稀少動用錢糧購買  
蘆葦者將失察之地方官嚴叅議處。○雍正元  
年議准每年山東河南巡撫飭令沿河州縣暨  
管河各官將沿河空地勘明各捐貲多栽柳樹

各以種柳細數呈報上司。三年後該督撫察覈報部酌量議敘。如希圖議敘強占民地累民者。即行叅究。至河南舊植柳樹年久枯壞者。令察勘一併補種。○三年議准。嗣後管河之分司道員同知通判州縣等官。於各該管沿河地方栽柳成活五千株者。紀錄一次。萬株者。紀錄二次。萬五千株者。紀錄三次。二萬株者。加一級。種葦一項紀錄一次。二項紀錄二次。三項紀錄三次。四項加一級。其有殷實之民栽柳二萬株。或種葦四項者。給予九品頂戴榮身。至效力各官。有

情願捐栽柳葦者。亦照此例議敘。儻有不肖河官。希圖議敘。占種民地者。題參從重治罪。再各處河營。每兵一名。每年種柳百株。若不能如數栽植者。將專汛之千把總。罰俸一年。守備罰俸半年。儻栽植不及一半者。專汛之千把總。降一級。暫留原任。戴罪補栽。守備罰俸一年。○五年覆准。令河南沿河州縣等官。檢稽地冊。會同廳汛。將現存柳園。並從前坍塌及新淤地畝。逐一詳勘。文明立界。如有隱占。撥補還額。廣為栽種。○乾隆三年奏准。嗣後山東河南印河文武官。

弁。於沿河官地內。有能捐貲栽成小楊五百株者。紀錄一次。千株者。紀錄二次。千五百株者。紀錄三次。二千株者。加一級。其沿河居民。有情願出貲在官地栽成二千株。或在自己地內栽成千株者。給以九品頂戴榮身。每年春間栽種。次年秋間覈驗栽成數目。題明議敘。楊樹交汎官收管。如栽成不及議敘之數。令其次年補栽併算。○五年議准嗣後沿河州縣地方官。有能勸民在沿河坑窪沮洳。不宜禾稼地內。種葦二百頃以上者。紀錄一次。四百頃以上者。紀錄三次。

六百頃以上者加一級。八百頃以上者加一級。紀錄一次。數多者照數遞加議敘。○又議准豫東二省額設柳園地畝。如有坍塌。即於次年新淤灘內。民人未經認糧領種以前。詳報咨部。按數撥補。每五年一次。飭令印河各官公同查丈。將原存柳地若干。坍塌若干。已補若干。取具冊結。送部查覈。如河官將坍塌地以少報多。印官不將新淤灘地據實報明。以及占用民地指為官地。有累居民者。該河督據實叅處。○又議准押勒栽葦。或所栽葦地以少報多者。照官員勒民

開墾地畝以少報多例。州縣官皆降一級調用。  
○又議准嗣後州縣官所屬境內有可栽葦草  
之地。勸諭不力。計十分之地栽植不及三分者。  
該督撫指叅。罰俸六月。不及二分者。罰俸一年。  
不及一分者。罰俸二年。二年內栽植仍不及分  
數者。降一級住俸。至三年內仍有不行栽植者。  
降二級留任。○又議准葦柳乃河工必需之料。  
令將柳樹數目葦棘地畝一併造入交盤冊內。  
再豫東二省全用楊椿。各汛報栽成活楊樹。交  
與該管廳官不時稽查。造入交盤。如有短少。詳

叅著落補裁成活足數者開復。○九年定葺蕩  
營額柴按年清完依限運交如未完一分者該  
汛千把總罰俸一年守備罰俸六月參將罰俸  
三月未完二分者千把總降職一級留任戴罪  
督完守備罰俸一年參將罰俸六月未完三分  
以上者千把總革職守備降職一級留任戴罪  
督完參將罰俸一年均限一年照數督催全完  
開復如逾限不完照所欠分數千把總分賠六  
分守備三分參將一分賠完之後亦准開復若  
每年餘葺至十萬束以上者紀錄一次再有贏

餘照數遞加紀錄。○又題准江南省黃河兩岸柳園丈出官地官民情願捐栽柳樹培養成活者驗明確數一併造報議敘。○十九年議准嗣後如有勸捐無術培養失宜致枯損缺少一千株以上者令該督將廳員職名同汛官一併叅處亦著令賠補。監生能於官地內捐栽楊樹四千株及在自己地內捐栽二千株者均免其考職給予主簿職銜。○二十二年奏准准徐淮揚二道所屬沿河一帶每年兵丁額栽柳楊數十餘萬株按年加增儘可足用無藉官民捐栽所



有南河捐栽議敘之例。應行停止。以免冒濫。再栽種楊樹。性宜高燥。豐銅等廳地方。不宜栽楊。嗣後種柳以收實用。○二十二年議准。東省運河額夫。照河兵例。每名每年栽柳二十株。於隄旁籤栽成活。長養成蔭。俾得攔禦風浪。盤結固隄。並令隄後坦脚栽植雜果樹木。如栽不及數。及枯損過半者。專管官罰俸一年。兼轄官罰俸半年。僅栽不及一半。專管官降一級留任。戴罪補栽。兼轄官罰俸一年。枯損在一百株以內者。責令專管官賠補。至一百株以外者。降一級留

任。俟賠完日開復。○二十三年議准右營柴束  
正月初旬勒限運清。至遲不得過五月。左營柴  
束五月內勒限運清。至遲不得過十月。儻逾限  
未完。罰令該管備弁。自備水腳。再限一月。全運  
清完。如再不完。即照未完葦柴之例。分別叅處。  
○又議准船隻到蕩。定限三日內裝完開行。到  
廠定限兩日內卸完放回。仍將抵蕩卸完日期。  
具報該督衙門查考。如逾限遲延。即行提究。又  
右營料船。責令經由之外河四營汛弁催趲。左  
營料船。責令經由之中河二營汛弁催趲。仍委

備弁。往來督押。設遇颶風陣水。人力難施之際。該弁目等一體協力保護。○二十四年議准。豫東黃河兩岸隄內隄外。以及沮洳坑塘官地。少而民地多。責令地方官勸諭民人栽種蘆葦。其有情願報捐者。按照成活數目。照例議敘。如或不願報捐。令本主自行栽種。給價交工。本主力不能栽。情願捐為官地。應汎各官另勸他戶捐栽。其捐出地畝額徵丁糧豁除。如或不願栽種。亦不願捐為官地。各聽民便。不得勒派擾累。兩岸灘地支河。責令地方官勸諭民人廣栽蘆葦。俾

得蔓延暢茂。盤結隄根。既可充裕工料。並可藉以攬禦。其河工歲辦料物。飭令地方官曉諭民間。令其葦梢並交。各照成規給價。僅有短價累民。查出嚴叅議處。至黃河兩岸廢隄兩面坦坡。循照向例。勸諭官民捐栽楊樹。成活之日。驗明議敘。豫省並無湖泊。皆係民人承種地畝。責令地方官勸諭民人栽種楊葦。有在官地栽楊五百株葦二項。己地栽楊二百五十株葦一項。給扁獎勵。免本年差徭。官地栽楊一千株葦三項。己地栽楊五百株葦二項。給扁免兩年差徭。如

統計三年之內。能在官地栽成小楊二千株。已地栽成一千株及種葦四頃者。咨部議敘。給予九品頂戴榮身。免五年差徭。○五十二年議准。右營蕩地坐落海邊。稽查難周。令葦營員弁。實力查察。毋許民人領墾。以致侵占官地。妨礙水道。○五十七年題准。豫東二省黃河南北兩岸隄圍。兵夫額栽柳株。業已徧栽叢密。若責令按額栽植。不特細小新柳。難以培養。而舊柳限於地方。反致不能暢茂。應行停栽。○嘉慶二十四年議准。葦蕩左右兩營。增採柴束。每年五月內。

將青柴長發情形分別上中下茂由本管道員  
確勘詳請具奏設有水旱蟲傷隨摺聲明又兩  
營收採額餘柴束如未經交廠被水淹浸除稍  
可適用之柴捆載運工外其虧折不堪應用者  
令該督委員查明加結送部奏明豁免僅有侵  
隱捏報情事即行叅辦設遇黃水衝缺漫灘柴  
束未能依限起運報部展限如未經報部即將  
遲延不報職名送部議處○道光三年議准葦  
蕩右營草地內衛灘地畝五百餘頃產柴葦網  
不適工用仍給大河衛旗丁領墾其地租即令

照舊完納。至此項地畝內撥出黃河南岸長隄護隄地十五頃零。應納租價即行豁免。○光緒五年議准。南河各廳自黃河改道後。灘地均已招租。效用兵丁免其栽柳交葦。仍責成照例挑積土牛。每年積土若干。動用若干。報部備查。入於修工案內造冊報銷。

禁令。○順治二年定。旗下軍船不許零星過牘。非時啟閉。致妨漕運。○五年題准。安山南旺兩湖地業經升科者。聽民佃種。其餘湖地。不許開墾妨漕。永為令。○又覆准。衛河渠口。每年四月

以後盡行堵塞不許偷放。○七年覆准運河行舟雖係進貢及裝載官兵亦不得擅自開牐。○九年覆准沛縣湖田禁民墾種令蓄水濟漕。○十三年覆准南旺臨清大濟及各處河官宅濟本境淤淺築壩未開之先豫頒告示禁止一應官船不得先期逼勒開壩貽誤工程。○又覆准令河臣申明各牐啟閉禁令先放糧船次放官船。又次放商民船如有啟閉不時洩水誤漕者指名題叅。○康熙二年覆准凡奉差及赴任各官定有限期者令糧船讓路。○又定差船到牐。



隨漕啟閉。有攬越漕運者。照例叅處。○四年。河  
臣請嚴定牐河啟閉。奉

旨。有奉緊要敕旨差遣者。著照前行。如糧船商船齊到  
牐。糧船先過。商船繼過。如糧船未到。商船先到。牐官  
勿得指稱糧船將到。强行攔阻。仍著放過。違者從重  
治罪。其一應往來官船。立有欽差牌扁。著永行禁止。  
如此等官船藉名緊急。擅行啟閉。於糧船之前爭先  
者。著該督撫指名題叅。○又議准。凡內外顯要職官。  
多置號舡。縱容家人於漕運河道往來貿易。或  
奉差赴任。各官額外私帶貨舡。並姦徒假藉名

色恃強闖牐者。河道各官指名呈報河漕總督。題叅究處。河道各官徇情不報。亦即題叅。如已呈報而總督徇情不舉者。事發一併治罪。○七年議准。

畿輔隄岸。關係緊要。禁止附近莊佃私開渠口。○八年議准。直隸省渾河隄上。禁止車行。如有損壞者。各歸該管官。○十一年題准。運官停泊漕舩。不聽督催。陵辱牐官。責打牐夫。攫去牐版。致洩水誤漕者。革職究擬。○二十一年議准。運河淺阻。漕船艱於程限。各處兵船。務隨漕啟閉停

泊如有扭鎖掀版恣意爭先者該督指名題叅將領兵將弁嚴加議處。○二十九年議准漕河開隄遲則稽重運。然隄早則阻回空。嗣後每年定於十一月十五日然隄正月二十六日開隄。○三十年覆准河南省河內縣丹河發源太行山至丹河口分渠九道內惟小丹河上秦河二渠通衛濟漕。嗣後如雨足之年於三月初用竹絡裝石橫塞河渠使水歸小丹河入衛濟漕仍留涓滴灌田。至五月杪重運已過則開放河渠塞小丹河口以防山水漫溢。儻遇亢旱之年自

三月朔至五月望令三日放水濟運一日塞口  
灌田過此以後仍從民便至輝縣束刀泉為衛  
水之源民間設五牖以蓄水灌田向例於五月  
初一日封版放水濟運但五月正農功需水之  
時應量渠之高下用竹絡裝石堵塞使各渠之  
水常盈則正流足以濟運餘潤可以灌田其安  
陽縣之萬金隄亦令仿束刀泉五牖之法用竹  
絡裝石相時塞牖通渠務使民漕兩無妨礙○

三十五年

諭山東漕船不得過牖以致遲延著差官帶戶部印封

前去封固牆版。須俟水滿開牆。以便漕船行走。如水不滿。雖奉旨事務。亦不許開牆。果有緊急陸路。亦可以行。凡內廷需用之物。悉停解送。○又

諭。自通州以至大通橋。民船不行。皆有禁令。今若令小船行走。於民似有裨益。著戶工二部會同倉場侍郎會議具奏。欽此。遵

旨。議定。嗣後通州至大通橋。應令民船貿易行走。若遇糧運緊急之時。暫行禁止。○又奉

旨。打魚小船。亦著行走。○三十九年。覆准。裏河淤墊。俟糧船過盡。即熬壩疏濬。一應差使。令暫由陸路

○四十四年。復准南旺湖涸出灘地。不許違例耕種。令地方官出示嚴禁。○又復准嗣後有故決盜決。南旺昭陽蜀山安山積水等湖。揚州高寶湖淮安高家堰柳浦灣及徐邳上下濱河一帶各隄岸。並阻絕山東省泰安等處泉源。有干漕河禁例者。不論軍民。概發邊衛充軍。其牘官人等。用草卷閘牘版盜洩河水串通取利。犯該徒罪以上。亦照前問遣。○又議准漕河各牘務依漕規啟閉。官員經過。不許徇情擅自開放洩水。致稽重運。違者不宥。○四十五年。遣官往運

河閘視封牐。

諭。今年水淺。自臨清至天妃牐七八百里。一時盡封。則不利於商人矣。當從上流封牐蓄水。俟水滿後再開一牐。糧船過時。他船不許濫放。○五十三年覆准。糧船過牐。務遵漕規啟閉。按幫放行。則水勢充足。不致遲誤。至於水漲牐溜撞沈搶修。乃意外間有之事。均准於單內註明。務於八月內全數卸完。回空。如逾定限。倉場侍郎題叅。○五十四年諭。大濬動工之日。一應往來船概行禁止。駐防兵船回空糧船。有恃強開壩者。拏解究處。○雍正元年

諭。每年漕船遲滯。皆由運河阻淺。運河之水。全賴山東諸湖蓄水。以資灌注。近歲漸就淤積。居民或占成田地。以致水少。不能濟運。今宜乘夏秋雨水之時。豫為蓄水之計。凡沿河田地。已經成田者。不必追究。其未經耕種者。速宜嚴禁。不可侵占。至諸湖隄防。須修築堅固。引水牕壩。務啟閉得宜。則湖水深廣。運河流通。不竭。漕艘自無阻滯之虞。○二年

諭。運河之設。未嘗禁商船之往來。但水少時。則加意管束。水大時。聽商船行走。京師百貨。取給於東南之商賈。今若嚴禁。則各種載船。必一概阻滯。商賈安能流



通於民生日用。均屬未便。欽此遵。

旨覆准。令總河總漕。直隸山東河南各督撫。檄飭沿河地方官弁。遇有商賈客船。許於漕船先後乘隙而行。毋許漕船攔阻。亦毋許商船擁擠。○又議准。運河一帶。用強包攬。舖夫溜夫二名以上。撈淺舖夫三名以上者。發附近充軍。攬當一名。並未用強生事者。枷一月。杖一百。發落。○又議准。小丹河。洹河。各牐。令該撫嚴飭河官。不時疏濬。仍遵舊制。三日放水。濟運。一日塞口。灌田。於糧船趨行回空之期。該河官親至水口。秉公啟閉。

將水勢情形設立循環號簿五日一次報明該管印官仍嚴禁偷放如河官通同賣水以致漕船阻滯者指名題參嚴加治罪○五年議准河工關繫重大嗣後有指稱夫頭包攬代雇希圖抑勒良民者照運河一帶用強包攬牘夫溜夫之例治罪二名以上者發附近充軍一名者枷一月杖一百發落○十一年議准黃運河工隄頂民房無論舊蓋新修概令遷移。

欽定大清會典事例卷九百十九

工部

河工禁令二

乾隆元年題准。山東運河。自江南省邳州交界。北至德州桑園鎮。綿長千二百餘里。水無來源。全賴各牕層層關束。務令啟閉以時。蓄洩得宜。庶於漕政有益。○二年

諭江南黃運兩河隄工。向有民人蓋房居住者。經河臣等議令拆毀遷移。以防作踐。旋以小民安土重遷。止令移去險要工所之房屋。其餘仍舊存留。此國家體

恤貧民之恩澤也。各隄民房。皆無額徵租稅。惟高郵  
寶應江都甘泉山陽五州縣。每年有應徵租稅三百  
八十餘兩。其閒拖欠不完。往往有之。若留此輸公之  
項。雖為數無幾。而追呼不免。恐有胥吏藉端苛索之  
弊。著將此項租銀。永行停止。並將累年拖欠。悉予豁  
除。惟是隄工乃河渠之保障。理宜加意慎重。以固河  
防。除現在已成房屋無礙隄工者。免其遷移外。將來  
不許增蓋。如有違禁增蓋者。即驅逐治罪。並將徇縱  
容隱之官弁分別議處。又

諭今年五月山東雨少。運河水淺。糧艘不能銜尾而進。

沿途乞淺起剝。甚費經營。而臨清以北。更多阻滯。朕細加訪察。臨清以北。全賴衛水合汶濟運。而衛水發源於河南衛輝府。至臨清五百餘里。居民往往私洩。灌溉經前任河臣題定。每歲於五月初一日。盡堵渠口。使衛水全歸運河。今日久法弛。衛水來源。小民不無偷放。遂致運河水勢長落不時。重運艱於北上。目前正當緊要之時。所當稽查嚴禁者。著直隸河南督撫速行辦理。務使衛水不致旁洩。糧運遄行無阻。

又奏准運河舊例。於十一月十五日煞壩。今改於十一月初一日開壩。日期舊例於正月二十

六日。今不必拘定。總以南漕幫船至臺莊牘為  
準。又覆准山東運河。自嶧縣臺莊起至臨清  
州南版牘。計四十八牘。牘河水無來源。照南旺  
挑湖之例。遇重運盛行。官民等船均隨漕開放。  
不許逼勒開牘。並頒發告示。刊立木牘。令各牘  
永遠遵行。又奏准運河各牘。收束水勢。全在  
啟閉得宜。會牌未到。催漕各官。不得逼令啟版。  
會牌已到。司牘官亦不得故意遲延。如有違誤。  
該督題參治罪。四年奏准江南省河工。天然  
南北二壩。收束諸湖之水。為洪澤湖之關鍵。責

令管河道員封固。永不許開。二十三年議准。山東省大小支幹各河。卹市毗連。人民稠密之處。令地方官勸諭居民。搭蓋木橋。以便行走。毋許卹民填墊路埂。私種蘆葦。以及捕魚簍斷壅塞水道。仍於每年汛後。逐一查勘。如有淺阻梗塞之處。即督率民夫。挑濬深通。年終出結存案。如失時不治者。將該管官照緊要隄橋不行豫修例。罰俸一年。兼轄官罰俸六月。又議准。東省南旺馬踏蜀山馬場安山諸湖。原屬濟運水匱。除安山湖久經淤高。不能濟運外。現在濟北

運者止有馬踏一湖。若水勢不足。嚴閉寺前鋪  
牘。使蜀山湖水。由利運牘放出。令濟北運。並將  
各湖地畝。逐一清查。如有額設祀田等項。照舊  
留存。明定界址。其餘凡有官民占種。概行禁止。  
○又

諭豫東黃河大隄相隔二三十里。河寬隄遠。不與水爭。  
乃民間租種灘地。惟恐水漫被淹。止圖一時之利。增  
築私隄。以致河身漸逼。一遇汎水。長發易於衝潰。匪  
注隄根。即成險工。不知隄內之地。非隄外之田可比。  
原應讓之於水者。地方官因循積習。不加查禁。名曰



愛民所謂因噎而廢食者也。著交與河南山東巡撫嚴飭該地方官。曉以利害。嚴行查禁。俾小民知所顧忌。不許再行培築。地方官不實力辦理。及廳汛員弁明知徇隱。即行叅處。嗣後如有仍沿積習。為害河防者。惟該撫等是問。○又

諭。芒稻一牕。乃歸江第一尾閘。向因淮南鹽艘。皆由灣頭河轉運。必須芒稻牕門下版。方可蓄水通行。以致不能啟放。合宜。前據該督等奏。牕東有舊越河一道。應令鹽船由越河直走金灣北牕。是洩水與運鹽已自分為兩途。芒稻牕自可常年啟放矣。但終恐狃於

蓄水運鹽之習。仍不免因循觀望。夫蓄水運鹽。不過少省緯輓之勞。而下河數州縣之民生攸繫。此其輕重。豈不較然耶。嗣後芒稻牐。應永遠不許再下牐版。俾暢流歸江。則諸湖積水自可減退。遇伏秋大汛。亦足以資容納。而下河一帶。將來蒙樂利之休矣。該督等將此旨勒石牐畔。俾後來司事者知所遵守。○又議准。東省府河係運河分支。自兗州府金口壩。由府城繞濟甯州東關北門。西入馬場湖。收蓄濟運。每遇水大。淹及民田。濟甯州東關楊家壩。改建牐座。水小則閉牐。收水入湖。水大則啟牐。

放水入運原屬緊要關鍵。交濟甯州州判專管。運河同知兼轄報運河道。勘明啟版。水勢稍退。立即閉版。則湖水常盈。漕運有濟。○三十七年。諭定泊利在寬深。其旁間有淤地。不過水小時偶然涸出。水至則當讓之於水。方足以暢蕩漾而資積蓄。非若江海沙洲。東坍西漲。聽民循例報墾者可比。乃濱水愚民。惟貪淤地之肥潤。占墾效尤。所占之地日益增。則蓄水之區日益減。每遇潦漲。水無所容。甚至漫溢為患。在閘閘獲利有限。而於河務關係匪輕。其利害大小。較然可見。是以屢經降旨飭諭。冀有司實力

辦理。今地方官奉行。不過具文塞責。且不獨直隸為然也。即浙江之西湖葑地。居民占者亦多。向日雖曾申禁。恐與直隸之玩忽。大略相同。而他省濱臨河湖地面。類此者諒亦不少。此等占墾升科之地。一望可知。存其已往。杜其將來。無難力為防遏。何漫不經意。若此。著通諭各督撫。凡有此等濱水地面。除已墾者姑免追禁外。嗣後務須明切曉諭。毋許復行占耕。違者治罪。若仍不實心經理。一經發覺。惟該督撫是問。

○四十六年

諭。河灘地畝。居民開墾日久。必致填塞河身。於河道甚

有關係。且居民廬舍占據灘地。猝遇水漲之時。勢必  
淹浸。於民居亦多未便。因特降諭旨。令確加履勘。其  
隄外地居高阜者。仍聽照常居住耕種。若占居隄內  
於水道有礙。即行明切曉諭。俾陸續遷徙。並令該督  
撫等妥為經理。毋致貧民失業。但此事當為之以漸。  
持之以久。因思灘地居民墾地結廬。已非一日。小民  
自謀生計。亦必非當衝刷灘地。聚居墾種。若偶然河  
徙衝刷。是伊自取。即水退亦不可復令居住。若其目  
前無事。不免安土重遷。且河隄以外。均屬民田。亦無  
隙地可以遷徙。所有舊居隄內灘地。無礙河身者。民

人已經築室墾種。仍加恩准其各守舊業。毋庸押令移居。以副朕廕念窮黎之意。至此後河南山東江南直隸等省。凡屬濱河隄內灘地。該督撫河臣必當嚴切查禁。毋許再行住居占種。如有從前侵占灘地。阻遏水道者。惟該督撫河臣等是問。○四十七年奏准。山東省黃河灘內邨民房屋。查明有礙水道者。概令遷移。○五十年奏准。江南省運河分段設立誌椿。以水深四尺為度。如水深四尺以外。任憑兩岸農民戽水灌田。如止消存四尺。毋致車戽致礙漕運。○又奏准。江南省宿遷境內駱馬

湖灘地嚴禁附近居民私行墾種並不准藉名升科希圖侵占如有仍前任聽私種者將失察之該管地方官及汛員一併嚴叅民人照例治罪○五十五年

諭大隄以內河灘逼近黃河每遇盛漲時留為河流蕩漾地步原應禁民居住庶不致與水爭地以免漫溢之虞今江南王平莊一帶邨莊多在隄內其豫省濱河之處及直隸永定河兩岸地方在隄內河灘居住者想亦不少從前巡視永定河經朕屢降諭旨飭禁而地方官奉行不力小民等又罔知後患止圖目前

之利以致邨莊戶口日聚日多。若不申明禁例。轉非愛護黎元之意。但民人等安居已久。未便令其遷移。轉致失所。著各督撫等轉飭地方官。將各該處隄內河灘。現在邨莊實有若干戶。房屋若干間。查明確數。造具清冊。嗣後毋許民人等私自增添。其有遷去人戶。即於冊內刪除。以杜影射占居之弊。並著各督撫於年終彙奏一次。務須認真查禁。毋得視為具文。以副朕慎重河防。保衛生民至意。○嘉慶四年

諭河工省分。各設廳汛員弁。專管修防。其地方守令無兼河之責者。原不應派令辦理河務。乃聞近來遇有



堵築挑濬大工。多藉幫辦為詞。派州縣令其貼解銀兩。並將上司應賠工程。亦令州縣代賠。以致派累百姓。挪移倉庫地方職守。且多曠廢。著直隸江南山東河南各督撫及河道總督。通行禁止。嗣後辦理河工。止准調派丞倅佐雜等官。不得再派州縣。致滋弊竇。

○又

諭河工省分。各設廳汛員弁。專管修防。若派州縣代辦。不但本任地方公事曠廢。兼至賠累難堪。嗣後遇有挑築工程。購料雇夫等事。附近沿河地方。亦止准派委丞倅佐雜幫辦。不得調用州縣。至距河千餘里及

數百里之處。即地方丞倅佐雜。亦不准其派往。○十

四年

諭。微山湖附近處所。多被民人開墾。不惟侵占湖地。勢必將上流泉水截住。以資灌溉。是近日湖水漸少。河身日淺。其弊未必不由於此。著山東巡撫會同河東河道總督。派明幹大員前往履勘。如所墾之地。已經成熟者。姑聽耕種外。其餘未墾及已墾復荒地。畝出示嚴禁。毋許再行私墾。庶濱湖一帶。泉流灌注。毫無阻滯。湖水愈蓄愈深。於運道方有裨益。儻此次示禁之後。仍有不遵。查明嚴行究辦。以利漕運。○二十一

年

諭。衛河發源豫省。由直隸流入東境。經過州縣。農民牒水灌田。設有定制。乃私自築壩攔截。本干例禁。著河南直隸山東地方一體申明定例。嚴行查禁。山東恩縣四女寺滾壩下游。係在直隸地方。尚未挑濬深通。以致去路不暢。德州哨馬營滾壩。並已淤塞。著各該督撫一併會籌妥辦。至催漕委弁。沿途需索。實為漕運之蠹。著漕運總督大加裁汰。其水次扼要之處。必須守催者。務派誠實幹弁。責令輕騎減從。並嚴禁需索。以肅漕政。○二十三年

諭山東運河全賴泉源接濟汶泗之間出泉處所本多聞地方官因恐報出新泉越時衰涸致干吏議往往隱匿不肯造冊送驗莫若量為變通各該州縣境內報出泉源不認真疏濬任聽淤塞自應加以懲處若實係源流涸弱該管上司查驗明確准予寬免處分庶地方官無所畏忌探有新泉即行呈報可廣收挹注之益○又

諭前據御史盧浙奏漕艘經過牐壩開攬人夫由漕委經管每多需索是以降旨責成牐官經管茲據孫玉庭等奏江南運河各牐壩開攬需用人夫衆多前因

幫丁惜費誤運。漕督始派員經理。厯久相安。運行無誤。若改歸牘員經管。幫丁非其所屬。轉恐互相爭持。有稽輓運。自係實在情形。且裁撤漕委。原慮其藉端需索。牘官賢愚不一。於雇夫給價等事。亦難保其不浮多濫索。著准其仍照舊章。分派漕委經理。但每牘塲止許派委一員。專司其事。如有額外多委。及本員勒派苛索情弊。查出隨時叅處。其牘官職司啟閉。飭令稽查彈壓人夫。俾職有攸歸。不致互相推諉。以利漕運。○又議准。東省疏出新泉。可以經久者。於查勘具奏後。該州縣將泉名勒石。申報各上司。由巡

撫臬冊咨部。又議准。東省微山湖存蓄湖水。如在誌椿九尺以下。蘭家山壩工。不便開放。致湖水耗竭。如湖水充裕。在九尺以上。應開放。蘭家山壩工。分濟邵境運道。仍於重運經臨時。察看湖水情形。由兩江總督。江南總河。同河東總河。彼此知照。酌定奏明開放。○道光三年奏准。蘭家山壩宣洩微山湖水。向由江省經營啟閉。嗣後如遇微湖盛漲。東境一面咨會。即委員啟放。蘭家山壩。先行盤築裹頭。酌定口門寬長。毋令出槽浸溢。期於運道民生。兩有裨益。○六年

諭東省上年各湖存水未能如誌近時泉源又復微弱自應通計熟籌嚴司啟閉先經張井籌議先儘北路水勢鋪灌後將上年回空軍船併塘打放銜尾南下將來盤壩重運北來著陳中孚通飭各幫均須連檣前進不准一隻脫空亦不許藉故齊幫停泊其裝卸貨載如有可停卸之處准其暫泊以示體恤如水淺河窄後有跟幫即不准停泊裝卸致礙船行若遇水淺起剝先卸隨帶貨物不得遽起米石以免折耗並著河東河道總督於本年重運過竣後即築朱姬莊攔河大壩收蓄湖水必須遲至九月間將湖水收足

再啟壩放令回空南下。其先期折回空船。暫令在長河守候。同時南旋。總期節省湖漕。以備來年重運。

又

諭河工要務。全在冬勘春修。每年豫發歲料銀兩。飭交工員乘時購備。將料垛土牛堆積如式。該河督向於霜清水落之後。前往沿河詳驗。以杜架空浮鬆之弊。將應辦春工。悉心覈估。一交春令。次第興修。剋期竣事。再行親往驗收。查明料物用存確數。以備伏秋兩汛之需。朕聞自嘉慶以來。各河督等習於安逸。往往不於霜降後。如期逐段勘驗。以致工員等將應貯花



堆剋扣偷減諸弊。視為固然。甚或有估辦春工時。輒以不應修而修。轉將應修處所。暗留為大汛搶險地步。以便藉另案工程。事起倉卒。易滋侵冒。著各該河督等。於例屆冬初。及次年工竣時。務須親歷河干。詳加勘驗。料垛必禁其虛鬆。工程必期其堅實。各宜不憚勤勞。力除結習。○七年

諭御史盛思本奏請飭禁南河工員。遠離汛地。以重修守一摺。河員職任修防。定地駐紮。原因往來工次。梭織巡查。若無故聚集會垣。易啟奔競。夤緣之漸。今如該御史所奏。河工習尚繁華。以奔走趨承為能事。徐

屬之豐北豐南各廳則常住徐城揚屬海屬之外北中河海防山安海安海阜各廳以及佐雜員弁則常住清江甚至平居飲食聚會任意花銷惟俟派委工段藉將所領銀兩彌補私虧如果屬實必當嚴行禁絕著蔣攸銑張井潘錫恩嚴飭各工員遵照部定地址分段巡防不許藉端逗遛會垣遠離工次所有修守事宜務當親身經理毋得諉之幕友家丁之手弊混開銷致滋浮冒○八年議准揚河廳高郵汛東岸設有車邏南關五里中新四壩以資分洩惟今昔情形不同應酌中定誌以運河之水長至一

丈二尺八寸。方可開放車運壩。長至一丈三尺二寸。再開放南關大壩。長至一丈三尺六寸。再開五里中壩。長至一丈四尺。再開南關新壩。俟河水長符定誌。即由該廳州隨時啟放。其中新二壩。地勢較低。俟水勢平定。首先堵合。並較準水則尺寸。勒石各壩。永遠遵守。○十三年

諭。黃河大隄灘地。向以裏四外六丈量。共寬十丈。歸官栽種柳草。以護隄根。其河北運河隄堰。則內外灘地多係民業。自應劃分官民界限。以重隄防。著仿照黃河大隄留寬十丈之例。減定留寬二丈。將河北之運

河中河兩廳所屬運河兩岸。自隄根起。內外各留寬一丈。其應完錢糧數目。由地方官查覈。分別豁免。禁止耕種。歸官栽植柳株。非特可以護隄根。並可備河工採料之用。經此次立定章程之後。總須實力奉行。斷不可有名無實。並著責令汛員。隨時稽查。如再有侵越盜種者。拏解地方官審辦。儻有隱匿不報。及弁兵自行偷種者。一經查出。將該管官嚴叅示懲。○又奏准南河地方。設有減水牐壩。分洩異漲。現惟北岸之蘇家山。南岸之天然牐。十八里屯等處。尚皆可用。向以徐州府城北誌椿存水丈尺。為

啟放準則。嘉慶二十四年。定以一丈八尺為度。  
道光六年。改為二丈七尺。茲奏明定為二丈五  
尺。嗣後總須長逾定誌。始准啟放水。落即行堵  
閉。十五年奏准十字河囊沙引渠內。向有沙  
壩一道。長十九丈。底寬六丈。高一丈一尺。距西  
河脊十九丈。今移築於三十五丈之外。高與原  
壩相平。俾壩外引渠展長。既能容沙。仍可蓄水。  
至十字河為微山湖收水之路。今既移築沙壩。  
收水應有定制。如微湖存水在一丈三尺以外。  
則沙壩毋庸啟除。若消至一丈三尺以內。俟重

運報完即酌量挑啟以資收蓄。逮符定誌仍即

堵築。○十六年

諭水手發給腰牌。原所以杜混冒。著各該督撫等嚴飭  
漕河運弁及地方文武各官隨時認真查察。儻有隱  
匿腰牌游蕩為匪。偽造腰牌冒充水手沿途滋事者  
一經查出均於應得本罪上加一等治罪。○十九年

諭江蘇丹徒丹陽縣境內河身淤墊每歲興工巡撫責  
成道府州縣州縣公事繁多往往責成家丁該家丁  
串通胥吏勾結工頭浮開夫價向例設有土圭內藏  
皮印該胥吏等通同舞弊乘夜將土圭托高巧做原

封樣式。偷減草率。糜帑誤漕。著即查明各項弊竇。出示革除。經此次訓諭之後。如仍有委任家丁。以致吏胥工頭串通分肥。即著從嚴叅辦。○咸豐元年奏准江蘇省高淳縣之東壩。為下游蘇松等府保衛嗣後永遠不准在勘定壩基南北十二丈之內。蓋屋搭棚。其應行建復廟祠。均飭於岸上購覓隙地蓋造。○九年

諭通惠河引河。業已挑挖工竣。水勢一律通暢。著奉宸苑隨時稽覈。毋令再有淤塞。至沿河洩水溝涵洞等處。新築土壩堆培泊岸。不准附近民居私行偷挖。以

資宣洩而利漕行。○光緒元年議准直隸省河淀淤地無礙水道可資耕種者分給貧民認種每戶自十畝至三十畝如私墾年久未經升科在百畝以內者仍聽本人自種輸租其百畝以上多餘之地俱行撤出毋許紳衿富戶以及豪強胥役詭名侵占。○又議准永定河十八汛河員俱兼巡檢銜將附近邨莊分撥兼管凡遇河工修防應用民夫准令糾集約束不得越分干預地方事務。○又議准高郵馮蠻子溝在五里中壩南關新壩南關大壩下游為吸引三處壩水匯



入澄子河要路。如有附近居民。攔築土堰。以致  
宣洩不暢。由地方官嚴行禁止。